

## Bahoansoan

Gentleman sī góa chhī ê káu-á, i tī 2001 M 7/28 thàu-chá sí--khì.

Gentle, lí chit-má teh chhòng sá<sup>n</sup>? Teh khùn? Kin-á-jit ū chiáh sím-mih--bô? Lín hia ē kōa<sup>n</sup>--bē? Lí ê chià<sup>n</sup>-kha kiám iáu ē thià<sup>n</sup>? Kā lí chù-siā ê ūi hó--bōe?

7 gòeh 30 hit-jit sàng lí chhut-soa<sup>n</sup>. Góa iōng sok-ka tē-á kā lí pau..leh, kōa<sup>n</sup> khì káu-á-tiàm, kau hō hóe-chòng-tiû<sup>n</sup> ê thâu-ke. Pài-thok i kā lí hóe-hòa. Góa siū<sup>n</sup>-tiōh chiok m̄-kam! Beh lī-khui ê sî, góa it-tit bong hit-kâi sok-ka tē-á, sim-koan<sup>n</sup> í<sup>n</sup>-á phòk-phòk chhái<sup>n</sup>, âu-kóng tī<sup>n</sup>--khí--lâi, bák-sái kâm bák-kî<sup>n</sup>, háu tī sim-koan<sup>n</sup> té. Kia<sup>n</sup> hō thâu-ke khòa<sup>n</sup>--tioh, hō lâng chhiò!

Lí tote góa ū 12 nî hiah kú. Góa chin hán-tit kā lí sioh. Chún ū, mā-sī thèh hó-liāu..ê hō lí chiáh niâ. Chēng poa<sup>n</sup> kòe-lâi Làm-po liáu góa chiū m̄-bat kā lí moh--kòe. Góa tūi káu-á bô sím-mih hó kám, in-ūi sè-hàn bat hō káu-á kā--kòe! Ē liáh lí tīng-lâi chhī sī in-ūi lí ê chû-lâng tú-hó sī góa ê hōan-chiá. I tài jiō-tòk chèng, tiōh ài khò sé io-chí kòe-jit. Góa put-sî kap i khai-káng, tī i sé io-chí bô liâu ê sî-chūn. Góa thia<sup>n</sup> i kóng lín bú..á se<sup>n</sup> bē chió káu-á kiá<sup>n</sup>, koh liáh lí lâi pē<sup>n</sup>-ī<sup>n</sup> sín-g-lâng. Góa tiōh sī hō lí kó-chui tit-lâng-thia<sup>n</sup> ê se<sup>n</sup>-tiu<sup>n</sup> sah<sup>n</sup>--tiōh! Chiah ē chhân-chhân kā lí moh--tīng--lâi! M-kú góa mā bô tiā<sup>n</sup>-tiā<sup>n</sup> kā lí moh, kā lí sioh.

Lí kiám iáu ē kì--tit? Khí-thâu lí sè-chiah, m̄-bat kui-kí, tī chhù--nih o-peh kā. Phòng-í, chhián-thoa, phôe-ê kap sa<sup>n</sup>-á-khò lóng hō lí kā kàu chhùi-kô-kô. Góa khí-mo bái chiū kā lí koai<sup>n</sup> tī piān-só! Lòh-bóe lí koh tī hia o-peh pàng sái-jiō, góa kui-khì kā lí tàn khì 4 lâu-bóe téng! Hō lí chit-ê kō-toa<sup>n</sup> tī hia. Chit-khóan ê sî-jit lóng-chóng tú-hó 1 nî.

1990 lán poa<sup>n</sup>-lâi Làm-po liáu-āu, lí ê thian-tē piàn kàu khoah-khoah-khoah! Tī chia, lí siōng tōa. A-Pûi..ê(kang..ê) kap Candy(bó..ê) lóng iáu-bōe lâi. 150 phê<sup>n</sup> ê khong-kan sūi-châi lí châu, thiàu, lòng, chông! Hî-tî-á lí mā thiàu lòh-khì sín. Āu--lâi koh ū Ah-bî-á lâi chò-phōa<sup>n</sup>. Jit--sî kā lí sai-nai, mē--sî kap lí kheh-sio, khùn sio-óá. Che eng-kai sī lí ê hó thi<sup>n</sup>-nî. A-Pûi..ê lâi, lí iáu-sī láu-tōa..ê. Candy mā kāng-khóan. Sui-bóng lí hàn-chháu siōng-kài sè. In mā lóng jīn-téng lí sī tōa..ê, m̄-kâ<sup>n</sup> kap lí ké-siáu. Siōng hō lí khí-mo bái kap ut-chut..ê khó-lêng sī Candy teh siáu ê sî, kan-ta A-Pûi..ê thang óa--khì, lóng bô lí ê hūn, hāi lí “khòa<sup>n</sup> ū chiáh bô kan-ta giàn!”

Lí sè-sè chiah, thih-mâng phāng chhng--chit--ē chiū chhut--khì. Ták-jit lí lóng tī lán chia chò kóan-khu..ê. Keh-piah Sò-sàng in tau, tūi-bīn Ông keng-lí ê chhù, tò-pêng Chansian--si<sup>n</sup> ê māng-kháu lóng-sī lí ê tē-pôa<sup>n</sup>. Bô pát-chiah káu pí lí khah tōa! Múi-jit tiong-tàu, iû-chhai sian-si<sup>n</sup> nā lâi, lí chiū hē sī<sup>n</sup>-miā pūi, aù<sup>n</sup>-aù<sup>n</sup> kiò. Iû-chhai chin siū-khì, chiū iōng chhê-á kā lí siáu, kā lí kòng. Ē kì--tit ū chit-pái lí hō lâng kòng chit-ē kai<sup>n</sup>-kai<sup>n</sup>-kiò, chha chi t-tiám-á pái-kha! M-kú lí iáu-sī m̄-kia<sup>n</sup> sī, chiàu-siōng tī māng-kháu kò, khòa<sup>n</sup>-tiōh iû-chhai mā-sī kè-siök pūi. Lâng kóng káu pūi hóe-chhia sī bô lō-iōng. Lí sī káu pūi iû-chhai thó phôe thià<sup>n</sup>! Aih, lín káu-á-kok..ê ná ē hiah-nih chheh iû-chhai?

Ták-pái góa nā tī tiâ<sup>n</sup>--nih teh chò sit, lí lóng ē kiâ<sup>n</sup> óa--lâi, tiām-tiām phak tī hia, ám-kún tah tī thô-kha, bák-chiu tōa-tōa khian, kim-kim kā góa siòng. Lí hit-khóan ê gán-sín góa chiok kah-ì. Sī hiah-nih-á chhū-jiân kap khin-sang, bô hōan bô ló. Ná-chhiū<sup>n</sup> teh kā góa kóng, “Thâu..ê, góa chin ài kap lí chò-phōa<sup>n</sup> neh.” Lí chiū án-ne tiām-tiām liâh góa kim-kim khòa<sup>n</sup>. Góa nā kā lí gán--chit--ē, lí chiū bóe-liu iô--ñng--ē. Góa siōng ài chit-khóan tiû<sup>n</sup>-bīn kap khì-hun. Lán hō-siōng lóng ū kám-siū tūi-hong ê chhün-châi kap hō-siōng koan-sim ê hō-

i, kхиok бô chō-sêng hō-siōng jīm-hô ê put-an kap khùn-jiáu. Góa lóng ke-kiám ē khì kā lí so--chit--ē. Piáu-sī góa ê ài-sioh, sui-bóng góa m̄-sī chin ài káu-á. Chóng-sī góa chin hán-tit kā lí moh.

Ē kì--tit bô? Candy tú lâi hit-chām-á, góa ták-kang chiáh-pá siu<sup>n</sup>-êng chhōa lín khì Jīn-bí Kok-hāu ūn-tōng-tiâ<sup>n</sup> châu. Góa châu chò chêng hō lín jiok. Lí, A-Pûi..ê kap Candy lóng châu kàu chiok hoa<sup>n</sup>-hí. Hit-chūn A-Tekk chiah 8 hòe, I-Mee 5 hòe, I-Maa 39 hòe, góa 41 hòe, lí chiah 1 hòe thóng niâ. Lán lóng chò-hóe chhut-mñg. Sui-jiân ták-pái lóng kui-sin tāng-kōa<sup>n</sup>, mā kám-kak chin sóng-khởai kap khí-mo giang. Sng--khí--lái mā í-keng sī 10 nî chêng ê tāi-chì--lah. Chin kín! Jīn-seng mā bô kúi-ê 10 nî.

Lí hō góa siōng khí-mo bái..ê chiū-sī kiò bē lâi! Ú chit-àm, góa beh koai<sup>n</sup>-mñg khì khùn, tī mñg-kháu kiò lí jip--lái. Kiò kui-po, lí tiôh sī m̄-khéng jip--lái. Koh chò lí châu--khì! Góa hóe tōa khí-mo bái, chhut-khì kā lí liâh--jip--lái. Góa chhùi ná chhoh, chhiú ná kā lí phah thâu-khak. Lí hō góa phah liáu chin thiâ<sup>n</sup>, sòa tōa-sia<sup>n</sup> kai<sup>n</sup>, koh beh kā góa kā! Hō góa phah chit ē koh khah thiám!! Jip-khì pâng-keng liáu-āu, góa chiah khai-sí hóan-hóe! Góa ná ē kā lí phah kàu hiah thiám? Bē-su beh kā lí phah hō sí--leh! Hit-mê it-tit teh siu<sup>n</sup>, m̄-chai ē kā lí phah chit--khì bô? Góa sêng-jīn hit-àm chiú lim siu<sup>n</sup> chē, sái sèng-tē, chiah ē hiah-nih chho-ló! Chin sit-lé!

Ú kúi-pái lí kám-mō, chhóan-khùi ē hiùh<sup>n</sup>, phī<sup>n</sup>-thâu ta-ta, lâu bák-sái-ko, chhùi-chih thô-thô, bô gôan-khì. Góa khòa<sup>n</sup> tiôh chin m̄-kam. Iōng iôh-á hō lí chiáh. M̄-kú góa m̄-chai iôh-liöng beh án-chóa<sup>n</sup> sng. Hó-ka-châi, góa ê hó pêng-iú Koeh i-su sī siù-i. I kà góa chái<sup>n</sup>-iū<sup>n</sup> kap iôh-á hō lí chiáh. I-hông-siā mā lóng-sī i bián-chî<sup>n</sup> hō góa iôh-á kā lín chû..ê. Ta<sup>n</sup>, lí lóng bē koh-châi kám-mō--ah. Góa m̄-chai kiám ài thè lí hoa<sup>n</sup>-hí?

Lí ê thâu-chêng chiâ<sup>n</sup>-kha, chin châ tiôh se<sup>n</sup> liû. Khí-thâu góa lóng bô iàu-ì, siu<sup>n</sup> bē kàu sòa jú lâi jú tōa. Kàu pòa<sup>n</sup> nî chêng ê khóan, lí khai-sí kiâ<sup>n</sup> tiôh lō iōng chhiáng..ê, góa chiah chai-iá<sup>n</sup> tāi-chì giâm-tiöng--lah. Chóng-sī siù-i mā jīn-têng bô iàu-kín. Góa chiú bô koh kā lí koan-sim, ták kang khòa<sup>n</sup> lí iōng sa<sup>n</sup> ki kha chhiáng--leh, chhiáng--leh. Khòa<sup>n</sup> kàu góa ka-kī mā bâ-pì! Chit-chām-á, I-Maa chhut-kok, góa koh ūi-tiôh Bîn-sī 8/5 beh hoat-piáu lûn-bûn kap TLH 8/19 beh sêng-lip, ták-jit mā bô-êng kàu 1 tiám góa chiah chiah tiong-tàu-tn g. Àm-sî tñg-khì kàu chhù lóng mā chiok thiám. Kán-tan khat kóá-á chhî-liâu hō lín chiah tiôh koh khai-sí bô-êng góa ê tāi-chì. Lóng bô thang kā lín khòa<sup>n</sup>--chit--ê. Kàu 7 gòeh 10 góa ū chit-jit I-Mee kā góa kóng lí ê kha teh nôa, koh ū chhàu-bî. Góa chiah chim-chiok khòa<sup>n</sup>. A-niâ òe! Lí ê kha-tê-á í-keng nôa beh chit-pòa<sup>n</sup>--lah! Kut-thâu mā khòa<sup>n</sup> hiän-hiän! Góa khòa<sup>n</sup> chit--ê, chit-hong-bîn phī<sup>n</sup>-tiôh chhàu-bî bô sóng-khởai, lêng-góa mā kám-kak góa chit--ê Thâu..ê sit-chit, bô chek-jîm! Góa sim-koâ<sup>n</sup> chhiù<sup>n</sup> to teh koah! Kui-kang sim-chêng lóng chiok bái. Hit-jit góa lóng-chóng chiah chit-tñg pñg niâ. Bô hoat-tô, góa ka-kī kā lí chû-siâ, iōng siōng kiông ê iôh-á, Amikin, kā lí chû. I-Mee mā khòa<sup>n</sup> lí khó-liân, khì bê hó-liâu..ê lâi hō lí chiáh. Hi-bâng lí ê té-khòng-lát ē khah kiông. Chù 5 kang kám-kak ū chìn-pô, chiú thêng--löh--lái. Kòe bô kúi jit, thia<sup>n</sup> tiôh lí teh hiùh<sup>n</sup>, góa chiú chai-iá<sup>n</sup> chit-sia<sup>n</sup> bái--löh, koh châi kā lí chû-siâ.

7 gòeh 28 hit-àm, Tâi-pak hiah-ê gín-á lâi lán chia. Hit-àm góa châi in tñg--khì. Góa khòa<sup>n</sup>-tiôh lí bô sîm-mih gôan-khì, phak tî thô-kha, chhóan-khùi mā chin chiáh-lát. Hit-chûn góa chin chai-iá<sup>n</sup> lí khó-lêng thoa bē kòe keh-tñg-jit! Lí kā góa thèh hō lí ê bah chhìn-chhái chiáh--kúi--chhùi--ah, chiú koh phak--leh! Góa mā bô koh chhap..lí, jip-khì chò góa ê tâi-chì.

7 gòeh 29 sī lé-pài, góa ài khì siōng-pan. Góa beh chhut-mñg ê sî, khòa<sup>n</sup>-tiôh lí tó tî tiâ<sup>n</sup>--nih, 4 kha tit-tit, bák-chiu koh ū chin chê hô-sîn teh chng. Góa óa khì kā lí bong, lí ê

sin-khu léng-léng, 4 kha ngē-ngē. Lí í-keng lí-khui góa chò lí ka-kī cháu--khì. Aih, Gentle! Lí chin-chià<sup>n</sup> khì--lah! Góa bô siū<sup>n</sup> beh khàu, khàu mā bô lō-iōng! Lí góa ê iân-hūn kàu chia ôan-kiat--lÔh. Hi-bāng lí khì tī khòai-lòk ê sè-kài. Bô hôan bô ló.

Chiàu góa ê i-hák tì-sek phòa<sup>n</sup>-tōan, lí eng-kai í-keng kòe-khùi 5 tiám-cheng chó-iū. Sng---lâi lí sī tī 7 góeh 29 ê thàu-chá 2,3 tiám hia tñg-khùi..ê.

Ta<sup>n</sup>, góa tñg--khì ê sî bē koh thia<sup>n</sup> tiòh lí pūi ê sia<sup>n</sup>, chit-chióng ē hōr góa sim-an koh chhin-chhiat ê sia<sup>n</sup>. Tī tiâ<sup>n</sup>--nih chò-kang ê sî bô lí koh lâi kap góa sio-siòng, kā góa sai-nai. Chóng-sî kám-kak sit-khì sím-mih, khiok kóng bē chhut--lâi!

Sàng lí chhut-soa<sup>n</sup>, chóng ē bák-khø âng, phī<sup>n</sup>-kñg sng, sim-chêng ut-chut. M-kú, che sī sū-sít, mā-sî bô hoat-tō thang kái-piàn ê tāi-chì. Siá chit-tiu<sup>n</sup> phe hō..lí, kan-ta beh kì-liòk kap siàu-liām lán ê chit-tōa<sup>n</sup> iân-hūn, siāng-sî mā thong-tháu góa lōe-sim ê put-an kap phō-khiám.

Chài-hōe--lah, Gentleman!

Koh hōr góa sioh--chit--ē!

10:47 PM, 2001/8/9

Sió-khóa chiú-chùi, Làm-po Chhù--nih.